

Wer sich bedenckt noch der gedat  
Des anslag gmeynlich kumbt zu spat/  
Wer inn der gdat gut anleg kan  
Der muß syn ein erfarnen man  
Oder hat das von frowen gelert  
Die syndt solchs rates hochgeert/  
Hett sich Adam bedocht vor bas  
Ee dann er von dem appfel aß  
Er wer nit von eym kleynen biß  
Gestossen vß dem Paradis/  
Hett Jonathas sich recht bedacht  
Er hett die goben wol veracht  
Die im Tryphon in falscheit bot  
Vnd in erschlug dar noch zu dot/  
Gut anschleg kund zu aller zyt  
Julius der keiser / in dem strit/  
Aber do er hat frid vnd glück  
Sumbt er sich an eym kleynen stuck  
Das er die brieff nit laß zu hant  
Die im in warnung worent gsant/  
Nycanor vberschlüg geryng  
Verkoufft das wyltpret / ee ers fyng  
Sin anschlag doch so gröplich fällt  
Zung / handt / vnd grynt man im abstrält  
Gut anschläg die sint allzyt gut  
Wol dem / der sy by zyten düt  
Mancher ylt / vnd kumbt doch zu spot  
Der stoßt sich bald / wem ist zu not /  
Wer Asabel nit schnell gesyn  
Abner hett nit erstochen in



c